

五  
峯  
遺  
稿

玉峯遺稿卷之十六

序

慶都憲盛公壽七十序

成化丙午冬都察院左副都御史盛公上章曰臣明  
年年滿七十加以犬馬疾不能事事惟  
皇上哀憐賜以骸骨不勝幸甚章三上

上憫之若曰茲惟夙夜秉德以事朕者不欲重煩以  
政其特賜馳傳以歸榮於鄉命既下凡朝之縉紳莫  
不咨嗟涕洟謂公德業聞望在朝蓋不多見且清明  
健強志氣不衰奈何去以是為公惜抑以為朝廷惜

時公撫巡東夏東方諸侯與列郡吏民亦連上章留  
公公皆不顧即日解組南還春正月抵家華顏綉衣  
光動閭里蓋公以少壯登朝白首賜環而歸恩榮壽  
考全德始終錫山前此未有道路觀者莫不嘖嘖嘆  
賞乃四月二十日適公初度之辰公之弟雪溪先期  
於春仲之吉具酒箴為公壽凡錫之大夫士莫不往  
賀而變於公為甥也得預賓筵之末禮有頒有祝觴  
既行曰執爵起而言曰惟自昔有非常之功德者必  
事非常之報天人之理至不誣也故商周大臣以勲  
名居耆老之位洛社諸賢以德望享耆願之壽良有

以也夔嘗考公德紫炳炳琅琅著於王家洽於生民  
已非一日故能享榮名登上壽又全其晚節天之報  
公固已厚矣況公之歸也家庭之內子孫多賢而雪  
溪君克念天顯聞自公之歸日思闢地栽花與夫烹  
鮮擊肥以為公晚年之娛者無所不至又不知古之  
倦而歸者曾有此否耶夫享榮壽於全盛之時樂夫  
倫於歸休之日然則公其為天壤間全福之人也哉  
易曰利往攸吉順無不利公其有焉故以是為賓筵  
頌雖然夔抑聞之人臣之義不果於忘國故古之元  
老大臣固有致仕歸洛後再入中書知政事者其典

策具存可考見也方今

聖天子在上望治如渴夙夜圖惟舊人以任厥政其  
安車之徵鳩杖之賜旦夕且下公尚強食自愛勉為  
蒼生再起夔敢以是為賓筵祝前之頌為公也後之  
祝為朝廷也頌祝既備僉曰善遂書以為壽序

送王黃州太守序

八年秋 朝以南京秋官郎中王君景明為湖廣黃  
州守

命既下或謂君操履純篤器大聲宏宜參大藩膺重  
寄顧拜一郡枉其才而用之殆非所宜余曰不然郡

守尊官也雖統於藩而其爲用也實重且專於民情尤親任得其人則績易以著聲易以流政化易以行非藩岳之佐比也誠以所聞見者質之余同官謝君世脩頃由武選副郎出守寶慶寶慶僻在江湖濱化未易行世脩下車薄征徭崇教化剔奸蠹不三載奸者戾病者起呻吟者歌謳名隱隱起公卿間時天子方愛念元元選廷之重臣巡行天下察吏之能否得一切以便宜從事今都御史繁昌吳公寶巡歷湖南威振岳牧行郡至寶慶獨進世脩而揖之曰子賢守也請毋以所屬之禮見慰勞之辭有加復上其

事於朝旌異之

詔旦暮且下而湖南藩臬諸公歲

時道金陵稱世脩不釋口矢守之職重且專而世脩  
又濟以有為之才故能就此赫赫聲向使世脩得參  
藩岳則不過分一職督一事雖有才亦俟俟焉無所  
施尚望其上敬下化之速有如是耶今以王君之才  
且賢不在世脩下而黃尤為大郡是行也鋪大和以  
惠醵蔭宗至公以服大家吾見其績之就聲之流化  
之行有若河決下流而東注而今之重臣必將嘉君  
之行舉而旌異之而藩臬諸公亦將交口薦譽以張  
大其聲光如世脩無疑也異時以治平第一人為公

卿固可預卜然則君之任果經乎哉君行有日縉紳咸聲詩贈之屬余為序余與君交最厚不敢以他辭進請以世脩之事為獻

慶松軒楊公壽七十序

去邑西數十里有山曰安陽其高數百仞中一峯亭亭挿空狀若卓筆故又號為文筆峰山之旁世家楊氏居之山無異產其蜿蜒磅礴之氣意者獨鍾於人而楊氏尤得其氣之秀而完者故其家百餘年來人才輩出顯揚於時則有若宜間文厓二公相繼以清才雅望登庸省署其一時勲名之盛有三朝



詰命可攷隱居山林則有若老閒松軒聽玉諸公同  
時以詩書道德師表鄉邑風流文采迥出時輩遠甚  
況群從兄弟皆為惠連科第衣冠後先相望噫一何  
盛哉今年秋八月七日松軒公壽躋七袞其宗戚子  
姓鄉黨賓客將於是日置酒合樂以慶之先期梅庵  
老人來言曰松軒公一代偉人今當古稀之年而吾  
儒瘖無一言歌詠之豈尊賢尚老意哉於是合善鳴  
者效詩人頌禱之意為詩若干篇以贈而俾余題其  
首余唯人之壽雖原於天而致之亦有其道植其本  
全其天遭其時斯可矣公山人也請以山木喻之上

古有大椿焉生於兩厓之間土厚而泉冽山奧而氣  
溫斤斧之所不至牛羊之所不牧震以雷電涵以雨  
風故能暢茂條達榦摩乎青霄根蟠乎后土而八千  
之壽可致矣人何獨不然公白首偃息湖山之間布  
德施仁厚自培植有詩書琴瑟足以相其德衣裳鼎  
俎足以奉其體子孫賓客足以樂其志况遭值

聖明全盛之時一塵不驚和氣之所薰陶德澤之所  
漸被所謂植其本全其天遭其時者俱已兼之其他  
日壽之遐福之崇當何如哉公酒酣試携青玉杖出  
門望陽山其蒼顏尚無恙否觀於山則公之壽可知

三山通志卷之六  
五  
矣詩云如岡如陵吾於公有望焉公諱璠字叔璵松  
軒其別號云

送興化潘太守詩序

七年冬職方郎中潘君舜絃拜命為興化守將行  
秦子會客觴之於江許酒半客有執爵而言者曰君  
踐履純篤器大聲宏落落處南畿踰數載未嘗一遭  
顯用今之選也宜得藩佐重職以騁其文章政事之  
才顧拜一郡所轄之邑僅二殆非

聖明量才授職意也余應之曰今之仕者將徒欲崇  
虛名驚高爵以為榮乎將欲推其平日之所蘊以及

於民也若徒欲崇尚名爵以為身榮則郡守固未若  
藩佐所處之為尊苟稍有志於民則郡守之職其於  
民也親其為職也專其恩澤易以流治化易以行視  
藩岳之佐固有間矣何則蓋藩岳地殷雖尊其佐貳  
以下各有分職有大事例不敢專決必咨方伯而後  
行歲時行郡縣入其疆問其事理乎則弛然而歸不  
得復干預他政事故雖懷抱利器拘於職不得盡展  
力勢反出郡刺史之下今君以老成通達之才明白  
簡易之守其有志於民久矣顧未得其地耳是行也  
據其地展其才敷施德惠搜剔奸蠹有強必剪其角

距使海邦之民皆得含哺鼓腹以樂於湖山田里之間則君之器將益大聲將益宏而爵位將駸駸手益進獨藩岳之佐之足榮哉況興化地雖小而文明甲於東南號海濱鄉嘗而其化尤易以行余有以知君之此行若卿雲一出將挾彩晴漢而觀其景光者彌彰也客曰唯於是諸公各即席賦詩為贈謂余與君處最从宜有序故不辭而書諸首簡

宜間詩集序

長嘯宇宙間高才日凌替人於前輩文章追慕於後世之後未嘗不形諸聲嗟氣嘆慕之深故嘆之切蓋

其秉彛好德之心有所不能自己者耳此吾於鄉先生都憲楊公宜間詩集之作所以不能無慨也歟公邑文峯世家幼負巨志大才不凡弱冠以文章知名登己未進士仕

英宗朝爲戶部郎中擢山西參政歷陝西河南左右布政所至詢察民隱鋪張大和著匪躬之節成化間徵拜少司徒和鈞關石翼亮有加轉都察院右副都御史撫巡畿甸及河南荆襄等處以便宜數上封事所言皆生民休戚大計時論歸之其立心制行清忠大節表然獨步當世可謂雄偉而傑出矣然公賦性

清簡雖踐塵華要澹然不以屑意獨喜爲文章尤嗜  
作詩每政務有暇輒謝遣吏士焚香苦吟凡懷鄉戀  
國 王事有勞與夫懽忻戚愉悲鬱無聊不平之氣  
一寓於詩焉發之濡毫引紙力追古作鏘然而金石  
奏曄然而天葩敷其短章精悍若猛士赴敵百戰百  
勝其長篇快意處若健馬在御奔逸絕群若驚濤出  
峽而御之以長風也亦奇矣哉昔昌黎韓子謂文章  
之作多出羈旅草野若夫王公貴人氣滿志得非性  
能而好之則不暇以爲若公者豈其所謂性能而好  
之者歟公早歲與故吏部侍郎東吳葉公與中俱有

盛名變間嘗竊評當世人才未嘗不以二公為稷契  
輩人方以霖雨鹽梅之業望之而景命不融二公相  
繼云逝於乎斯文之不幸耶抑世道之不幸耶公卒  
於成化丙申至是其孫昂哀其遺文得詩自古體以  
下摠若干篇將錢梓以傳不朽謂余有世契也以序  
見屬變惟公勲業文章之在天下若繁星麗天人得  
而見之得而知之奚待變之謫陋置喙其間哉然追  
念先輩凋謝義不容默故三復少陵之詩書此以引  
其端公諱璿字叔璣宜間其別號云

永寧文集序



故都察院左副都御史水壑盛公既卒之數月其弟時正索公遺文得所著序記碑銘奏疏與夫五七言雜詩歌行總若干篇彙次成帙而附以名公寄贈之作題曰水壑集將鋟梓以永其傳間屬嬖序其首變公之甥也且自幼親炙道德辱公教益良多亦公之門生也兼是二者則於序公之文奚辭公天資明睿讀書過目成誦終身不忘景泰二年登進士第拜監察御史侃侃有直臣風天順初上章極詆權奸謫知東甌縣事爬痒擲垢治有聲績遷邵武知府歷陞陝西左布政使

憲宗皇帝雅聞公名召為刑部右侍郎久之轉今職  
持節撫巡山東時青齊海岱之間飢民載道公賑恤  
有方全活甚衆事已在太史氏蓋公以豪傑之才稟  
清明粹和之氣充之以老成篤實之學故施之政事  
常不足以展其才間以其餘發為文章公暇濡毫伸  
紙落筆千言然要皆自胸中流出不蹈襲前人一字  
一句晚年急流勇退得湖山花月之助文益工詩益  
奇駿駁追配古作亦盛矣公立心制行本之以清忠  
亮直持之以和厚謙慎故能全節始終自趣休山林  
朝野日望其再起而公已捐館矣嗚呼變慨念錫山

自

國朝以來以勲業文章知名當世者獨公與都憲宦  
間楊公二君子而已十餘年間相繼淪沒不勝晨星  
之感幸而殘膏賸馥託諸編簡者昭然未泯後之君  
子能曰是求公之立心行事感發興起於百世之下  
則是編固後學之筌蹄也歟公諱顯字時望永寧其  
別號云

老桂秋香詩序

上登極之二年適當大比求賢之秋余友素庵先生  
俞君公武以名隸太學將買舟北上就試京闈頗行

其徒太學生華君德純介庠友趙君永錫來需文為  
贈且曰先生自束髮以文字為職業列精剔思浸淫  
六籍含穠咀華抽黃對白其於業可謂精矣敦孝行  
義動師古人簞瓢晏如守道安貧其於行可謂修矣  
然而名不登於仕版跡屢黜於有司顧後進之士已  
懷金紆朱而先生尚兀兀一經豈才高者固為造物  
所忌不然何先生之落落不遇如此耶唯執事幸賜  
一言以釋吾疑余曰不然本固者木茂器大者晚成  
獨不觀夫南山之桂乎其色蒼然其資鬱然視春風  
桃李之姿若可愧矣及秋高風露清絜萬卉俱已具

駢而桂也獨揚芳吐秀天香萬斛實自桂牙老幹發  
焉是桂有待於秋而後香也若先生者豈似之乎况  
天子仁聖主司公明是行也必將收孟明於三敗之  
餘起卞和於再刖之後由是而掇巍科魁多士若探  
囊取物若執左契而責償於人直易易耳所謂郗林  
一枝舍先生其誰哉於是二君皆起謝曰如執事之  
言吾旦夕將望先生於青雲之上矣請遂書以為先  
生贈余曰諾回書以歸之而工於辭者繫之以詩

逸國薛姪詩序

國聲以去年春登進士歸榮於鄉已一易星霜矣至

是告予將北上且需言以壯行色余老且拙何以為  
國聲賸然獨念吾秦氏自少游先生父子以科第文  
章顯於宋其後子孫皆遜迹儒農寥寥四百餘年來  
無能繼其後者迨 國朝天順間余與從兄嵩明先  
生始同時濫觴鄉闈如六陰之極而一陽漸萌此吾  
秦氏科名發軔之一初也繼此而下諸姪又森然襲  
書香並起至成化丙午偉與國聲又同捷焉弘治壬  
子鑑又捷焉上下不三十年登名鄉書者五人而余  
與國聲又先後俱登進士蓋至此而科名宦迹始駸  
駸日臻於盛若火然泉達非復曩時比矣然前此余

與高明已相繼引年來老林下任籍不免落落則所以繼往躅而承前休者不有賴於吾國聲耶國聲質美而氣清學充而才膽幼承卑牧先生家庭之訓已卓然知所向慕及長益攻苦力學不懈卒底成立且持行謹謹謙恭孝友溫然如良金美玉人望之皆知其為希世重寶莫不敬而愛之國聲固吾宗之千里駒也夫充其學豐其才植其行而又遭逢

聖天子求賢聖治之秋茲行也際風雲而陟華要其於從政也何有雖然少年登高科躋美仕此前輩之所忌若國聲去是尚益敬戒之哉北行適齊魯之郊

至汶水東望有壁立萬仞巍然高出雲霄者泰山也  
泰山以不讓衆土故能成其高國聲能觀山以成德  
而不安於小成則他日功名之所成就尚可量哉策  
勲

明王之朝而增光我前人之業者端在茲矣於其行  
書以勗之若夫歌遠遊叙離別以寄其情者則有群  
公之珠玉在焉故序

輓詩後序

歲辛亥四月三十日邑承事郎鄒君良節以疾卒鄉  
之大夫士亦旣往弔哭於其位已而不能殫其哀則



又形諸聲詩以歌詠之詩凡若干首而兩都士大夫  
聞君之賢繼而作者又若干首皆所以悼淪沒揚休  
光其意懇惻而深遠雖詩之黃鳥少陵之八哀不是  
過矣詩成其孤翎偕梅庵高公聞來徵言序其後余  
固哀承事之不能已者序則奚辭君爲人讀書識大  
體作事不隨人後遭家中微能力本治生卒以貲雄  
於鄉一時諸大家皆弗及也然輕財好施歲減田租  
什之一以濟其鄉之人人有負弗能償焚香棄符與  
之弗較人以此稱長者尤篤於倫理少孤事其兄如  
事嚴君恂恂執弟子禮終其身不少衰同產姊寡居

而貧周恤備至男婚嫁資用一不以煩其家宗子  
祭田為有力者所兼并代償其直復之其平生善行  
大率多類此君上世自南山翁以來皆知名當世嘗  
構聚玉堂涵翠亭以延致四方賓客

國初文章大老呂志學主汝玉錢仲益王孟端輩  
嘗觴咏其中瓊辭麗藻粲然具存君珎歲而世守之  
不啻拱璧故家文獻至今賴以不墜若君者不賢矣  
哉賢而弗克躋上壽以沒則仁人君子固不能無感  
於中宗族哀之鄉人哀之兩都大夫士亦哀之哀之  
深故詞之切此皆大理民頌之自不能泯者非矯也

意昔孔子疾沒世而名不稱若是編之作君之名將  
曰是而有稱乎與世之泯然無聞如電滅漸盡者異  
矣蓋祁公論始定信哉君別號撫松堂應  
詔納粟授承事郎故人稱為承事云

慶藻庵吳先生七十壽序

昔蘇文忠公作王氏三槐堂記引申包胥之言曰天  
定勝人人定亦能勝天所以明為善者必食其報若  
顏氏之夭盜跖之壽天之未定耳嗚呼天人交感  
之際昭灼不昧如此亦可畏哉觀於鄉先生藻庵吳  
公為鄉於斯言益信先生邑右族上世皆推高皆為

鄉善人至先生尊君復民公益敦大雅和厚樂易恢  
然長者也委祉儲祥遂昌厥後先生性耿介重然諾  
侃侃剛直負氣敢言與人交必輔之以正不肯妍媚  
苟且世方樂孰收媚而先生獨以剛正自持與世滋  
不合弗恤也宣德間復民公嘗被誣謫鎮表家人遭  
國祿時先生年尚少雖在顛沛中介然特立以勤苦  
自勵家非其義一毫不妄受家既落開門授徒以資  
養母居間肆志問學自經史百氏以至裨官小說無  
不通究尤詳於興故遇名賢所製必手自抄錄無遺  
其好古博雅如此錫山素有詩派遭世承平 家君

寄倡爲碧山吟社與一時名公觴咏爲樂而先生更  
預焉晚年家益和裕而二子潛潤亦森然玉立以詩  
禮世其家吳氏之澤其來蓋未艾也夫仁人君子天  
寔相之初復民公遠謫萬里人頗謂天道幽遠難恃  
然不旋踵事卒得白而先生又以詩書起家致有今  
日上下不數十年回視邑之豪門巨宗皆影滅斯盡  
而吳氏駸駸益昌以熾譬之鄧林之木窮冬嚴凝氷  
雪摧剝之餘其生生之本固在一旦乘陽春勃然而  
興鬱然而復茂矣此豈人力之所能致哉天也先生  
公年壽躋之表康寧和豫體貌不衰春仲廿有一日

其誕辰也潛洵將是日捧觴為先生壽先期徵文以  
仰祝頌之意余雅知先生世德之深天將報以厚福  
其壽祉之遐蓋未可以逆計也遂誦文忠之言以為  
先生壽不識以為何如

慶從兄東隱先生壽六十詩序

嬰幼時與從兄東隱先生情最相狎居最相近而出  
入起居嬉遊謔浪恒相同也先生性俊爽不羈嘗西  
遊金陵登鳳凰臺北走燕趙之郊尋五陵豪俠與之  
相追逐上下以洩其胸中之奇父之心氣和平歸買  
一廛于城東之隅閉門養恬益日脩飭種德復善聲

稱赫然夫昔史稱遽伯玉德與年俱進先生豈近似  
之耶先生今年壽濟六袞步履康寧髮際黑未變蓋  
其所稟於天者甚厚又所稟既厚而又脩德以基之  
積善以培之吾見他日福壽之來將如川方至而日  
方升詎可以淺近量哉五月三日寅唯初度之辰先  
生開草堂燕客時夔與從兄高明先生族兄司稅先  
生適謝事家居相率偕羣從往賀之觴酌旣行余謂  
壽難事兄弟至親況人生百年有同過客而羣從之  
賢不愧惠連不有述作曷申雅懷於是各即席賦詩  
得詩自司稅以下共若干首而外之詩檀大老若梅

庶高公杏軒黃公輩又若干首盛矣哉詩成命余弟  
仲孚繪林泉高士圖而推轂引諸其端云

贈郡太守吳公致政南還詩序

弘治七年二月同知常州府事吳公上言臣年六十  
三歲不幸被犬馬疾不能事事願乞骸骨歸田里唯  
天地大德矜而許之則臣未死之年皆

陛下之所賜也事聞上察其誠而念其勞於是進  
公郡太守之職俾致其政以歸命下群臣莫不感  
歎自相國少傅徐公大司寇白公都察院右都御史  
詹公詹事府詹事陸公輩僉致書為公賀且寵之以



詩若文公亦榮且幸矣公四明之鄞縣人學充而氣和愷悌君子也發身名科成化初通判閩之汀州未幾以憂去服除改潤州所至以廉寬得民久之當道以潤州政簡不足煩公理也又自潤移常公練達有為名聲益起尋陞同知大抵公之為政不尚威嚴一以愛民為主而又濟之以廉貞之操充之以明敏之才故化行澤流民戴之若赤子之於慈母居九載朝廷以民之安公也增秩進階使仍其職於常又封贈其父母若妻以示寵異公前後居常餘二十年未嘗一日易操及是以疾歸達近之民莫不咨嗟第

淺遑遑焉如失所怙恃而吾黨之能言者又相率為  
詩歌道其願留之意詩成揮使盛公時正間來徵言  
弁其首辭不獲則唯士君子生逢全盛之朝仕宦  
官至四品一旦以小不豫求去

夫子加恩賜歸此曠世奇遇自漢兩疏與唐之楊少  
尹後如公者殆不多見昔史稱兩疏去時東都送者  
車馬賓客甚盛漢書既載其事而昌黎韓子又為文  
張之以今視古蓋信然矣况公家庭之內多賢子孫  
讀書能文駸駸躋於榮顯而所居又當稽山鑑水之  
間形勝甲天下茲歸含和保冲有山水足以怡情有

子孫足以繼志陶陶然享全福於太平無事之秋不知當時兩疏之歸亦有是否

慶遊齋先生壽七十序

化國之日舒以長故其民多壽然則入之壽固原於天要亦視所遭遇之時何如我國家

列聖相承咸以一德格天故天報以景福百餘年來海宇寧謐祥風瑞日蒸爲太和疵厲不作兵戈不興民生其間以濡以養熙熙焉咸登於仁壽之域耄期之老在在有之有司歲奉

明詔頒賜粟帛深衣鶴髮婆娑滿庭下余嘗欲因所

見命工畫圖以彰太平休徵願惟鋪張洪休有太史  
氏巨筆在畫不畫無所損益也然終欲託事一宣之  
於言未果今年冬十月余方治事坐公府有美一儒  
戟然而來蒼顏華顙儀觀甚偉望之若碧梧翠竹爽  
氣洒洒逼人余甚訝焉登而進之則余吉水遜齋先  
生羅公也先生少舉明經天順間嘗領教錫山余時  
為弟子員曾執經受業殘膏賸馥露被於我後學者  
良多時先生年已涉知命矣旣而余忝登仕版宦轍  
東西而先生亦致政西還江湖天遠不能嗣音然丰  
神態度未嘗不徃來余懷竊念先生耄且衰矣詎意

別去餘二十年及相見而體貌益康健乃如此斯固  
先生疇昔脩身慎行善合於天故天錫以遐祉俾之  
優游蔗境以膺多錫抑亦遭值太平和氣休徵之所  
致耳先生明年壽屆七旬春二月四日乃其  
西歸將掃草堂烹鮮擊肥與親朋為一日之樂

余宜一言為長者壽余不文然與先生為師友有  
祝之義況太平休徵亦區區鄙懷素欲模寫而未能  
者故不揣輒書此以為先生賀先生行矣余聞文江  
多衣冠大老相見試以余言質之以為何如

徵遠錄序

鄉友談君朝章與弟大章襲其先僉憲公詩文成帙  
間過余請題序首簡辭不獲則敬受而讀之首

勅命五通次詩文若干首公分教歸安時著也其在  
京師及西蜀之稿多不存焉又其次則名公贊贈  
誌若干首謹名之曰徵遠錄嗚呼其所以昭茂實揚  
聲光垂後裔者孰有尚於此哉可嘉也已余生也後  
不獲與公交然嘗挹清風於金陵宦邸而知其際矣  
公以乙榜分教歸安尋以能入為御史出僉外臺所  
至著赫赫聲

朝廷

褒封有加其發而為文章皆和平大雅之製不煩繩削而自公鉅度詩尤冲淡有晉宋人風致所謂有德言功烈者非公而誰歟以故諸名公相與稱述其美舉非諛佞之辭考諸斯錄可見已夫士惟無所作於前故無善可徵於後則其區區平生軒冕富貴如鳥獸遺音烟雲過目而已雖有孝子慈孫烏能有所稱述哉公之德業若斯文章若斯信有徵矣其後人見之必曰吾前人有是大美顧吾可之哉必思所以步武而求其澤焉則斯錄之作有補世教不已深乎朝華博學守古而大章又有文名皆篤於孝敬入咸

稱焉茲錄特其一端云

慶綱庵先生壽七十序

麒麟鳳凰斯太平之美瑞乎曰非也醴泉芝草斯太平之美瑞乎曰非也瑞不在物而在於人人之瑞奈何彼朝廷清明海宇寧謐輒卽無疵癘之災田野多黃髮之老斯瑞矣我

國家重熙累洽治隆三代其泰和氤氲之氣亦既蒸為芝草益為醴泉聚為景星慶雲然皆不足以當其瑞其和氣之極實鍾於人故生斯世者率多壽考余嘗兩守名郡往來盱鄂之間每



朝廷

詔下郡國存問高年則垂白之老布滿車下亦盛矣  
哉然高年之老固為太平之瑞況儒其冠盛其服挺  
仁賢之高風當詞林之健筆如吾錫山文社諸公者  
其為瑞又何如耶社中諸公屈指十有二人而吾友  
綱庵李公舜明乃其一焉李氏邑明經世家遠祖琳  
仕宋為吏部尚書文雅有威名由尚書而下傳十  
世至公之尊君確軒先生季父慎軒先生兄弟繼起  
白首婆娑以文章道德相高其儒澤由來遠矣公聰  
明孝友幼承兩翁之訓肆力於學及長博極群書其

學益深博無涯涘發為文章卓然名家天順成化間  
嘗預脩

英憲二廟實錄一時鄉邦大老若太宰思軒王公都  
憲宜間楊公冰壑盛公輩皆與為文章交公今年壽  
躋七袞十月二十三日乃其初度之辰其子覺預於  
新正之吉置酒合樂慶之而鄉之大夫士又莫不為  
詩以歌咏其事而俾余題其辭焉余惟天將壽斯文  
之脉必薦生儒碩而與之以年使之為斯文主故西  
京諸儒若伏生申公俱年八九十歲以至百歲卒能  
補壁經之殘缺興漢廷之禮樂天豈無意於其間哉

今公生休明之代稟至和之氣而受斯文之託他日  
爲伏爲申有不待言而可知者今日太平美瑞舍公  
其誰哉故僭書此爲公賀抑以爲斯文賀

五峯遺稿卷之十七

序

登瀛詩序

登瀛詩若干首為送企齋進士張君元之作也曷取於登瀛蓋取唐學士登瀛洲之義所以深望於元之也元之年少有氣節尤工文章自為諸生時揚翹舒英已有文譽於場屋間然非其所謂文也及為進士則盡棄舊習刻意古作取兩漢已下諸書無不熟讀而探其旨趣久之芳潤內融彪炳外見故其發為文章溫潤典雅駸駸上逼古人凡吾黨之士稱能文章

者於後進中必以元之為稱首而元之自視歉如也  
元之登甲辰進士又明年其尊君不幸下世元之杜  
門讀禮城府無其一跡蓋撫松楸而泣血者星已三  
周矣今年冬十二月祥琴聲希將謁選北上邑之大  
夫士慕元之為人且喜其將入仕也於是乎有詩歌  
之作焉元之行矣今

明天子在上赫然有意三代之治求賢若不及從善  
如轉圜聲色不邇貨利不殖宮室苑囿遊觀之樂有  
所不好此誠十載奇遇而今之居廟堂而典銓衡者  
又有若三原王公以老成耆德夙夜為天子求才以

輔成化理元之挾所有而往其將有合乎哉不久當  
為侍從處清要載筆鑿坡以鋪張討天之洪休以丕  
贊維新之盛烈必不鬱鬱居於下僚則諸公今日登  
瀛之作斯其兆矣夫岐山之陽有鳳焉天下有道則  
見虞周之時嘗聞其鳴而見其來儀余嘗獨恠夫當  
今之世未見其出而鳴者豈今之為瑞不在於鳳固  
在於元之也元之勉乎哉吾將聽子之鳴而觀太平  
之盛也已

贈醫師周惟謹序

小兒斑疹之發與傷寒略相類而治之尤難俗傳有

厲鬼司之故三吳間有患疹者其父母不求醫惟謁  
巫祈禱爲絮其廬齋沐以事神禁家人毋敢出聲恐  
觸神怒即不治不治其必自責曰我之奉神弗虔致  
是不敢懷纖毫怨怒意惟慮後復有求焉致悞而死  
者踵相接也故巫不誅醫不行民不得正其死或曰  
巫固當禁也醫獨可恃乎哉鄉之氓貧且蠢有患疹  
不事醫藥惟飲水如故然歲死於是什纔三四焉都  
邑之處環天下之醫聚焉千金之家其子患疹必召  
數醫操劑詣門戶外復恒滿自謂可無恙也然歲死  
於是什至四五焉醫可恃乎哉余曰不然醫聖人之

教也聖人慮民之飲食寒暑有致於夭死者故為之  
醫以保其天年非若巫之假神號以惑人但後世其  
道弗明挾空竦之術而曰醫之師醫之師其不至於  
悞人於死地者幾希矣故醫不必發唯在擇其良而  
用之夫操輕舟下三峽冒瞿塘滪澗之險惟長年三  
老能任其責不幸而遇夫庸蒿師不覆則溺今治疹  
之法與操舟過三峽等詎可委之庸醫師哉今年春  
余從弟用中其子患疹色外赤而裡白家人強其禱  
巫弗聽博求夫醫之良得周惟謹氏治焉惟謹年少  
壯術精專其業已三世矣既至設以劑浹旬而愈用



中請文謝焉夫疹危症也世之患是者不惑於巫則死於庸醫之手者環相視也而用中獨能矯其弊擇惟謹而用之而惟謹又能良其術不負所託如操舟下三峽而遇夫篙師之良宜其事之克濟也使信醫者皆惟謹則巫不必誅而醫自行民庶得正其死不然吾又懼夫末流之未止也余素昧平醫曰用中之請姑以是塞白不識惟謹以為何如

壽秋林陳公七十序

咸化丙申歲今致政繕部員外郎秋林陳公壽躋七  
嘉平月某日寶唯初度之辰泰子領客賁酒肴賀

於其室秋林公坐溪山第一堂焚龍涎之香奏黃竹  
之音朱顏綠鬢若神僊下臨而雲擁之也予若姓相  
繼進賀壽觴既舉衆客皆賦詩為壽祝之望之不一  
而足泰子獨起而執爵言曰諸君知秋林公之壽可  
祝亦知公之所以為壽乎蓋人之壽固在乎天賦之  
人培之若生不逢時政苛令急干戈相尋則悲離顛  
殞危亡日迫壽可必乎今秋林公質厚而氣充端重  
凝遠若深林虎豹年登古稀清明健強其得於天者  
既厚而襟度坦夷際

三朝官兩京餘二十年事上臨下一以誠簡節殊目

不為苛刻細瑣之政其培於已者亦且深矣況值  
聖朝七葉重光仁涵義濡至治之美格於上下通於  
神明敷之以祥風沐之以甘雨疵癘不作干戈不驚  
民用平康鑒於壽域華顙黃髮之叟抱子弄孫戶有  
而家不乏也夫秋林公以老成天賦之質際此雍熙  
累洽之化厚其賦培其基遭其時其壽詎可量哉不  
必尋閱歲玄圖啖千年之桃酌九霞之觴而綿綿之  
算將方來未艾也客嘯曰子真知壽之所自哉詩成  
余謂余宜序諸首故不辭而書以為賀抑為天下蒼  
生賀秋林公字進之方其仕進時以美庵名其軒

不忘 君及引年而歸愛秋林中萬物皆歛華就實  
獨錦楓一葉濯濯可玩得趣之義故又改號秋林以  
寓意云

贈外科檜軒寶先生序

外科之名起於近世古無有也周官醫師所屬有疾  
醫有瘍醫豈今之所謂外科乎余嘗者內經而知其  
治法矣夫諸痛痒瘡瘍皆屬心火其病發於少陽太  
陰者恒多蓋相火濕土所受也治之之法急須審其  
內外表裡之分脉在表而形外顯此自外而之內者  
必托裡以固其本否則邪易入而內必潰脉在裡而

毒氣內閉此自內而之外者必疏通而宣導之否則  
邪易溢而外必張譬之老將用兵敵在內則攻之在  
外則攘之勢不容緩如斯而已矣然必先調榮益脾  
無黨邪無伐和無實實無虛虛使真元不衰則邪氣  
自消古之善為瘍醫用此道也故離內經治瘍非醫  
善者世固有鹵莽戒裂挾一方下技號於人曰我善  
為瘍揆鍼與七竅意治之往往陷人死地此豈特醫  
師之非良抑亦求醫者之不審耳邑外科實承芳世  
以治瘍聞鄉人有患瘍者即之輒愈今年春余友吳  
君錦堂疽發於腋勢危甚已而轉於背呻吟號呼群

醫治弗療延君至則曰疾雖殆尤可急治緩則無及耳乃投以劑外攘內攻而扶元益真之劑有加未幾邪清真合如酤之蘇嗚呼若永芳之治瘍豈余之所謂古之善者歟錦堂念厚德不可無報間與鄉先生陸公懋成來需言贈之且曰利非永芳所急必予之文庶足以張之余重永芳之良於醫而加錦堂之能擇也惟所見序以復之

五峯遺稿卷之十八

行實

盛孺人馮氏行實

孺人諱妙德姓馮氏錫巨族也世以貲雄曾大父元甫大父守仁考本淳咸秉德弗耀有聲鄉評間妣李氏孺人幼端靜聲柔氣和平居不妄笑言而資明敏遇事有分辨不可眩以偽喜讀書見古今貞女孝婦事輒慨然有願學意元精女紅為父母所鍾愛選婿得今承事郎盛君時正盛氏族大以顯舅贈都察院左副都御史靜齋翁素重厚長者姑太淑人馬持母

道尤嚴孺人入門敦行孝謹相夫子順以正處妯娌  
恭以和御妾媵嚴以恕至於內外族姻無戚疏賤貧  
咸處之不失其宜翁姑雅愛之翁嘗客五羊城太淑  
人在堂孺人晨夕侍側恂恂若孝女家政一以身代  
脫簪珥釐奩具以拓田廬日大其家太淑人每稱於  
所親曰自吾得新婦付托有人矣而閨門修整動止  
有法度鄉俗春月女婦多出遊山寺孺人每切齒以  
為戒故無事趾未嘗越戶限居太淑人及靜齋翁之  
喪哀毀幾滅性春秋相祀潔嚴有加尤善教子篝燈  
課讀每至夜分彬彬俱有成立晚年家門貴盛輿馬



僕從盈庭孺人無驕色益自貶損過歲輒勸承事  
若發粟以賑鄉里矧揆之貧者曰君不以此時施惠  
布德富貴可常保耶伯氏冰壑公少壯登朝歷官都  
憲揚歷中外幾四十年相承事君執弟子禮恭順如  
一日雖遠在數千里外時節必轉致水陸異味及遣  
使問安否以為常撫從子暨女恩禮尤篤婚嫁之資  
必豐必備焦勞至忘寢食成化間冰壑公年及七十  
天子加息賜歸時承事君髮亦種種兄弟友愛彌篤  
日烹鮮擊肥相聚為樂花竹園池之勝甲於一邑故  
都憲公自壯而仕老而歸了不以家事累其心者豈

獨承事君克念天顯亦孺人協相有道所致夫自王  
化不行閨門無完德而孺人卓卓所成就如此君子  
以為難享年六十以弘治三年八月五日終於正寢  
病且革精爽不亂從容勗諸子以脩身保家言訖而  
逝子二長虞禮部印局冠帶儒士娶張氏次夔太學  
生娶卞氏皆有才器孫男一銓聘江陰夏良厚女孫  
女四皆許聘名族嗚呼唯孺人之行於古有光墓石  
宜有銘以垂不朽夔與世姻知之甚詳姑撫其槩為  
狀上太史氏唯採擇而用焉

故承事郎趙公妻華孺人行實

孺人諱淑清姓華氏無錫大族其先有諱寶者南齊時以純德至孝實造有家逮宋元入國朝世嗣奕葉益熾以昌五世祖子勉江浙財賦都總管府同知高祖彥高曾祖德遠祖仲安父以昌咸有隱德母虞氏孺人聰明仁孝幼有至性居常獨處閨門下帷讀書史治女紅時節未嘗出遊為父母所偏愛及笄擇所宜配歸同里故承事郎趙君汝明趙宋宗室盛國公叔黔之後門第清華而承事亦秀而文以貲鉅接例納粟為承事郎孺人入門肅恭誠至奉養不怠舅姑以為賢稱之六親姑嘗盛暑遘疾勢貼危孺人號泣

扶侍蠲牀褥弱枕簟晝夜靡間至疾既革無所施力  
乃仰呼天泣曰天乎吾何以極吾姑也即閉門刺股  
出血和羹以進姑飲之尋愈君子以為誠孝所感後  
舅姑皆至耄年而終治喪如禮相承事克宜於家忻  
忻愉愉無怠刻之行無驕矜之色鄉閭族姪歲時饌  
問與夫吉凶慶吊往來事一不廢故承事在外担担  
于于無所顧念曰所以成吾家立吾事者孺人內助  
之功居多承事嘗被誣繫獄孺人憂形於色每夕稽  
顙北辰祈祐事竟得白其善行卓卓類如此性節儉  
不喜浮靡嫁時奩具綺麗華美屏不用而所用率堅

完朴素衣服必澣濯補綴懼暴殄也然於調貧恤匱則不挂計遇歲歉必勸處士發粟賑貸曰積而能散福之所基也又曰專利不祥故鄉里鰥嫠無告之人多所全濟至今人皆曰於我有德平居訓諸子必以脩身慎行為先每讀史見古人成敗事必歷舉以示諸子曰某以脩德而興某以縱欲而敗前史昭昭不我誣也汝曹其戒勉之故諸子駸駸知所向慕既長皆表然人右故鄉里論大家之賢子弟必曰趙某趙某云

先君貞靖先生行實

先君諱旭字景暘其先高郵人遠祖觀仕宋為國史院編脩以道不合時謫死遠郡紹聖中子湛通判常州沒於官子孫回家高至五世祖瑞五府君又自常徙錫之富安鄉是為無錫人曾祖仲益祖彥和考季昇皆隱德弗仕先君生五歲而祖妣惠不祿已知哀慕及長清明莊重警悟絕人讀書日記數千百言族老長異之感勸令明經舉進士先大父不可曰吾惟兒一人忍令一日離左右耶則遣從鄉師余同文學為詩天與奇趣吐語驚人名聲日起時侍御成公始終名能為詩一時無當其意者獨愛先君之作曰是

後必以詩名家遂定終身之交家素饒裕正統間嘗  
為鴈石長非其好也去而益肆志於學其學以正心  
誠意為本不事章句嘗讀論語至於脩己以敬一詔  
而深有省焉曰此君子自治其身之萬金良藥也曰  
取脩敬二字顏所居室且以自號人亦以是稱焉天  
性孝友先大父嘗遘疾每夜稽顙北辰祈以身代憂  
勞盡瘁髮有變白者及卒哀毀過制事繼母華尤得  
其歡心弟孤貧不能自立養之終身雖一味之甘必  
割而餉之否則慘然不樂也歲時烝嘗必齋戒即事  
祇杜省器雖老矣一不屬之他人平居沈默寡言而

言必中理對賓客怡然終日風範未嘗少頽亦無疾  
言遜色世方尚巧而先君獨以拙守敦雅黜浮至於  
訓子孫亦必先行實而後文藝家庭之內以清謹聞  
性不喜見權貴人亦不喜為軒挺斬絕之行要以天  
下中庸自處故一時君子敬之小人畏之里少年無  
群聚為不善至相戒必毋令秦翁知其見重於人如  
此尤好善樂施人有急傾貲濟之不吝有吳某者嘗  
貲金百星商於江湖間既而舟覆樊山下盡亡其貲  
歸則號泣將目經先君聞之亟召而慰之曰痴男子  
得不然魚腹中足矣乃惜囊中物耶遂還其券其人



得不死人滋以是稱長者天順甲申以不肖貴蒙  
恩封南京兵部主事未幾復進封中憲大夫湖廣武  
昌府知府人皆以為榮先君處之澹如也晚年益自  
謙抑閉門焚香讀易足未嘗輕出邑大夫歲行鄉飲  
請冠賓席亦不赴然獨喜為山澤之遊嘗與斯文十  
老即二泉幽絕處結碧山吟社月率一會會則酌酒  
賦詩為樂而先君之詩恒為首唱即諸公有故不出  
則乘肩輿從二小僕獨行郊外遇會心處輒欣然停  
止山僧野老時時乞詩亦隨意與之不拒也為人素  
強無疾病雖老精力不衰忽患風痺調治久之疾良

已逾年復暴作竟不起易簀之夕尚端坐不廢巾幘  
子孫問所欲言徐張目曰吾於世無不足者尚奚言  
遂脩然而逝時弘治七年十一月十六日也享年八  
十有五卒之數月其友人李舜明輩僉議以先君平  
生學道動息有養葆光金素卒以令終據德考行宜  
有以追表之於是私謚為貞靖先生云所著有詩集  
若干卷藏於家配殷氏有賢行為鄉閭表率先卒贈  
恭人子男三長曰夔由進士歷官江西右布政使致  
仕次旦次與俱應

詔贈粟拜官亦嘗以雙孝旌門孫男四曰鏜曰銓

銳俱邑庠生次曰鉉孫女十曾孫三俱幼不肖等將  
以是年某月某日葬先君於龍山新塋與先恭人合  
祔焉顧碑誌尚未有銘摧苦之餘謹撫其行之崖畧  
為狀敢干 當代文章鉅公哀而銘焉以取信於後  
世若夫先君之德之行鄉人能言之搢紳亦能言之  
不肖則不敢私贊也謹狀